



維摩詰所說經卷第五

姚秦三藏法師鳩摩羅什譯

僧肇註

佛道品第八

爾時文殊師利問維摩詰言菩薩云何通達佛道



肇曰如上所云諸佛之道以無得為得此道  
虛玄非常行之所通通之必有以故問所以  
生曰應化無方為佛之道也既能體之為通  
達矣

維摩詰言若菩薩行於非道

什曰非道有三種一者惡趣果報二者惡趣行業三者世俗善業及善業果報也凡夫非其本實而處之皆名非道處非而不失其本故能因非道以弘道因非道以弘道則斯通達矣譬如良醫觸物爲藥故醫術斯行遇病斯治

是爲通達佛道

肇曰夫以道爲道非道爲非道者則穢惡並

起垢累茲彰何能通心妙旨達平等之道乎若能不以道爲道不以非道爲非道者則是非絕於心遇物斯可乘矣所以處是無是是之情乘非無非非之意故能美惡齊觀履逆常順和光塵勞愈晦愈明斯可謂通達無礙平等佛道乎

又問云何菩薩行於非道答曰若菩薩行五無間而無惱恚

肇曰五逆罪必由惱恚生此罪捨身必入地

維摩詰經 卷五  
獄受苦無間也菩薩示行五逆而無惱恚是由不以逆爲逆故能同逆耳若以逆爲逆者孰敢同

至於地獄無諸罪垢

肇曰罪垢地獄因也示受其報實無其因至於畜生無有無明憍慢等過

肇曰癡慢偏重多墮畜生

至於餓鬼而且足功德

肇曰慳貪無福多墮餓鬼

行色無色界道不以爲勝

什曰梵本云至色無色界凡夫生彼則謂爲

涅槃第一最勝今有爲而生不以爲勝也

示行貪欲離諸染著示行瞋恚於諸衆生無有恚礙示行愚癡而以智慧調伏其心

肇曰示行三毒而不乖三善也

示行慳貪而捨內外所有不惜身命示行毀禁而安住淨戒乃至小罪猶懷大懼示行瞋恚而常慈忍示行憍怠而勤脩功德示行亂意而常

念定示行愚癡而通達世間出世間慧

肇曰示行六蔽而不乖六度也

示行諂僞而善方便隨諸經義

什曰雖迹與諂同而實不乖正所謂善方便

而隨經義也

示行憍慢而於衆生猶如橋梁

什曰言其謙下爲物所陵賤忍受無慢猶如

橋梁也

示行諸煩惱而心常清淨示入於魔而順佛智

慧不隨他教示入聲聞而爲衆生說未聞法

肇曰聲聞不從人聞不能自悟况能爲人說

所未聞也

示入辟支佛而成就大悲教化衆生

肇曰大悲大乘法非辟支之所能行

示入貧窮而有寶手功德無盡示入形殘而具

諸相好以自莊嚴示入下賤而生佛種姓中具

諸功德

什曰佛種姓即是無生忍得是深忍名曰法

生則已超出下賤入佛境界也

示入羸劣醜陋而得那羅延身一切衆生之所樂見

肇曰那羅延天力士名也端正殊妙志力雄猛

示入老病而永斷病根超越死畏示有資生而恒觀無常實無所貪示有妻妾綵女而常樂遠離五欲淤泥現於訥鈍

什曰如太子慕魄比之也

而成就辯才總持無失示入邪濟而以正濟度諸衆生

肇曰津河可度處名正濟險難誑處名邪濟佛道名正濟外道名邪濟也

現遍入諸道而斷其因緣

肇曰遍入異道豈曰慕求欲斷其緣

現於涅槃而不斷生死

肇曰現身涅槃而方入生死自上所列於菩薩皆爲非道而處之無闕乃所以爲道故曰

通達佛道

文殊師利菩薩能如是行於非道是爲通達佛道

於是維摩詰問文殊師利

什曰自相遇以來維摩獨說似是辯慧之功偏有所歸今令彼說欲顯其德也亦云推美以爲供養

何等爲如來種

肇曰旣辯佛道所以通又問其道之所出也

維摩文殊迭爲問答應物而作孰識其故文殊師利言有身爲種

肇曰有身身見也夫心無定所隨物而變在邪而邪在正而正邪正雖殊其種不異也何者變邪而正改惡而善豈別有異邪之正異惡之善超然無因忽爾自得乎然則正由邪起善因惡生故曰衆結煩惱爲如來種也無明有愛爲種

什曰向總說此開爲二門也一切結屬二門

故偏舉二門也自此以下次第廣開也

貪恚癡為種四顛倒為種五蓋為種

什曰四倒為因五蓋為果是則名曰生死兩

輪兩輪既具六趣斯遊

六入為種

什曰義言六情愛也愛為生本故偏廣開

七識處為種

什曰初禪中除却初梵王及却初諸小梵自

後合為一識住却初唯有梵王未有餘梵梵

王念欲有餘梵餘梵爾時遇會來生梵王因

起邪見謂是已造餘梵亦自謂從梵王生雖

有精麗其邪想不異是名異身一想第二識

住也二禪形無優劣而心有若干除入解脫

種種異念是名一形異想是第三識住也三

禪形無精粗心無異想所謂一樂想是第四

識住也并無色前三地是名七識住也識住

識得安住也識念分明無有惱患無壞者是

名為住惡趣則苦痛壞四禪則無想壞非想

經言論 卷五 七  
滅定壞亦彼地心想微昧念不分明故識不  
安住也問曰欲界亦惡趣所壞云何立識住  
也答曰取地壞不取界壞欲界惡趣善趣趣  
乖地異苦樂殊致義不相涉故不相壞也又  
義云何應爲七住  
八邪法爲種九惱處爲種

什曰愛我怨家憎我知識惱我已身一世則  
三三世爲九又義云九結也

十不善道爲種以要言之六十二見及一切煩

惱皆是佛種

肇曰塵勞衆生即成佛道更無異人成佛故  
是佛種也

曰何謂也

肇曰夫妙極之道必有妙極之因而曰塵勞  
爲種者何也

答曰若見無爲入正位者

什曰若法忍至羅漢無生至佛皆名正位也  
言無爲而入者由取相見故入正位而取證

又言見無爲無爲者盡諦盡諦是其證法決定分明見前二諦時雖無反勢未決定分明言據其決定取證處也

不能復發阿耨多羅三藐三菩提心

生曰以現事明之也見無爲入正位者若法忍以上結使已斷既至其所始爲見之以本欲捨生死求悟悟則在生死外矣無復不捨即悟之義故不能復發菩提心也

譬如高原陸地不生蓮華卑濕淤泥乃生此華如是見無爲法入正位者終不復能生於佛法煩惱泥中乃有衆生起佛法耳

生曰喻入正位

又如殖種於空終不得生糞壤之地乃能滋茂如是入無爲正位者不生佛法起於我見如須彌山猶能發於阿耨多羅三藐三菩提心生佛法矣

生曰喻見無爲也此二喻以明萌發其事是故當知一切煩惱爲如來種譬如不下巨海

不能得無價寶珠如是不入煩惱大海則不能生一切智寶

肇曰二乘既見無爲安住正位虚心靜漠宴寂恬怡既無生死之畏而有無爲之樂淡泊自足無希無求孰肯蔽蔽以大乘爲心乎凡夫沉淪五趣爲煩惱所蔽進無無爲之歡退有生死之畏兼我心自高唯勝是慕故能發迹塵勞標心無上樹根生死而敷正覺之華自非凡夫沒命洄淵遊盤塵海者何能致斯

無上之寶乎是以凡夫有反復之名二乘有根敗之耻也

爾時大迦葉歎言善哉善哉文殊師利快說此語誠如所言塵勞之疇爲如來種我等今者不復堪任發阿耨多羅三藐三菩提心乃至五無間罪猶能發意生於佛法而今我等永不能發譬如根敗之士其於五欲不能復利如是聲聞諸結斷者於佛法中無所復益永不志願肇曰迦葉自知已心微弱不能發大道意至

於勝求乃後五逆之人傷已無堪故善文殊  
之說也

是故文殊師利凡夫於佛法有反復而聲聞無  
也所以者何凡夫聞佛法能起無上道心不斷  
三寶正使聲聞終身聞佛法力無畏等永不能  
發無上道意

肇曰凡夫聞法能續佛種則爲報恩有反復  
也聲聞獨善其身不弘三寶則於佛法爲無  
反復也又法華云二乘中止終必成佛而此

經以根敗爲喻無復志求夫涅槃者道之真  
也妙之極也二乘結習未盡闇障未除如之  
何以垢累之神而求真極之道乎以其三有  
分盡故假授涅槃非實涅槃也此經將以二  
乘疲歇生死進向已息潛隱無爲綿綿長久  
方於凡夫則爲未絕又抑揚特聽卑鄙小乘  
至人殊應其教不一故令諸經有不同之說  
也

爾時會中有菩薩名普現色身問維摩詰言居

士父母妻子親戚眷屬吏民知識悉爲是誰奴婢僮僕象馬車乘皆何所在

肇曰淨名權道無方隱顯難測外現同世家屬內以法爲家屬恐惑者見形不及其道故生斯問

於是維摩詰以揭答曰

智度菩薩母方便以爲父

肇曰智爲內照權爲外用萬行之所由生諸佛之所因出故菩薩以智爲母以權爲父

一切衆導師無不由是生

什曰菩薩如來通名導師以新學謂其未離受生應有父母今欲顯其以法化生絕於受身故答之以法也

法喜以爲妻

肇曰法喜謂見法生內喜也世人以妻色爲悅菩薩以法喜爲悅

慈悲心爲女

什曰慈悲性弱從物入有猶如女之爲性弱

而隨物

善心誠實男

什曰誠實之心於事能辨猶男有貞固之性成於家業也

畢竟空寂舍

什曰障蔽風雨莫過於舍滅除衆想莫妙於空亦能絕諸問難降伏魔怨猶密宇深重寇患自消亦云有非真要時復暫遊空爲理宗以爲常宅也

弟子衆塵勞

什曰衆塵即塵勞衆生化使從已令受正道也

隨意之所轉

什曰轉令從已化也肇曰塵勞衆生隨意所化無非弟子

道品善知識

什曰三十七品三乘通用菩薩兼以六度爲道品取其親附守護利益成就義同三益故

類之知識

由是成正覺諸度法等侶

什曰或有雖爲知識不必能爲克終之伴或有雖爲伴而不爲善知識又言伴侶明善始令終必至道場也

四攝衆伎女

什曰四攝聚衆猶伎之引物也

歌詠誦法言以此爲音樂

肇曰口詠法言以當音樂

總持爲園苑

什曰總持廣納爲衆妙之林竒翫娛心猶如園苑也

無漏法林樹

生曰夫無漏之法旣根深不可拔又理高而扶疏爲樹之像也漏法不復得間錯其間林之義

覺意淨妙華

什曰華之體合則不妙開過則毀開合得適

乃盡其妙也調順覺意亦復如是高則放散  
下則沉沒高下得中乘平直往開合之相其  
猶淨華也

解脫智慧果

什曰解脫無爲果也智慧有爲果也

八解之浴池

什曰水之爲用除垢去熱解脫之性亦除執  
去闕也

定水湛然滿

生曰止則能鑒水之義也既定意足湛然滿  
矣

布以七淨堊

什曰一戒淨始終淨也身口所作無有微惡  
意不起垢亦不取相亦不願受生施人無畏  
不限衆生二心淨三乘制煩惱心斷結心乃  
至三乘漏盡心名爲心淨三見淨見法真性  
不起妄想是名見淨四度疑淨若見未深當  
時雖了後或生疑若見深疑斷名度疑淨五

總序言終 卷五 五  
分別道淨若能見是道宜行非道宜捨是名  
分別道淨六行斷知見淨行謂苦難苦易樂  
難樂易四行也斷謂斷諸結也學地中盡未  
能自知所行所斷既得無學盡智無生智悉  
自知見所行所斷通達分明是名行斷知見  
七涅槃淨也

浴此無垢人

什曰無垢而浴者爲除熱取適也菩薩無結  
而入八解者外將爲衆生內自娛心也肇曰

總持強記萬善之苑也於此苑樹無漏之林  
敷七覺之華結解脫之果嚴八解之池積禪  
定之水湛然充滿布七淨之華羅列水上而  
後無垢之士游此林苑浴此華池閑宴嬉遊  
樂之至也豈等俗苑林水之權乎覺意七覺  
意也解脫有爲無爲果也智慧即果智也

象馬五通馳

什曰駕大乘車遊於十方自在無闕兼運衆  
生俱至道場也

大乘以爲車調御以一心

什曰一心梵本云和合道品心中有三相一發動二攝心三名舍若發動過則心散散則攝之攝之過則沒沒則精進令心發動若動靜得適則任之令進容豫處中是名爲捨捨即調御調御即和合也譬如善御遲則策之疾則制之舒疾得宜則放之令去縱步冥塗必之所往也

遊於八正路

肇曰五通爲象馬大乘爲上車一心爲御者遊於八正道也

相具以嚴容衆好飾其姿慙媿之上服

什曰旨取其防非止惡猶衣服可以禦風寒也

深心爲華鬘

什曰深心信樂故能修善處善之先猶鬘之在首又云深心發明衆善亦如華鬘飾形服也

富有七財寶

什曰信戒聞捨慧慙愧也處家則能捨財出家則能捨五欲及煩惱也由信善故持戒持戒則止惡止惡已則應進行衆善進行衆善要由多聞聞法故能捨能捨則慧生故五事次第說也五事爲寶慙媿爲守人守人於財主亦是財故七事通名財也

教授以滋息如所說脩行迴向爲大利

什曰行自行也以七財爲本又彼我兼利復

以此福迴向佛道七財彌增則利之大也  
四禪爲牀座從於淨命生

肇曰四禪高牀修淨命之所成

多聞增智慧以爲自覺音

什曰向說牀則致其安寢安寢則覺之有法故次說樂外國貴人眠時要先勅樂人明相出時微奏樂音然後乃覺今以多聞法音覺其禪寢也

甘露法之食

什曰諸天以種種名藥著海中以寶山摩之  
令成甘露食之得仙名不死藥佛法中以涅  
槃甘露令生死永斷是真不死藥也亦云劫  
初地味甘露食則長生佛法中則實相甘露  
養其慧命是真甘露食也

解脫味爲漿

什曰味有四種一出家離五欲二行禪離憤  
亂煩惱三智慧離妄想四涅槃離生死亦有  
二種解脫一解脫煩惱二解脫於閻也亦云  
愛性無厭名之爲渴愛斷則得解脫解脫止  
愛渴故名漿四味亦以除愛渴故爲漿也

淨心以澡浴

什曰心淨則無染無染即爲浴亦名遊八解  
脫也

戒品爲塗香

什曰淨戒除穢不假香也

摧滅煩惱賊

什曰煩惱有二種斷一遮斷二永斷摧滅遮

斷也下降伏四魔未斷也上說資養四體四體既平健則廣興事業自此以下是說其事業

勇健無能踰降伏四種魔勝幡建道場

什曰外國破敵得勝則豎勝幡道場降魔亦表其勝相也

雖知無起滅示彼故有生悉現諸國土如日無不見

肇曰知無起滅則得法身無復生分爲彼有

生故無往不見自此以下盡歎菩薩變應之德以法爲家故其能若此

供養於十方無量億如來諸佛及已身無有分別想雖知諸佛國及與衆生空而常脩淨土教化於群生諸有衆生類形聲及威儀無畏力菩薩一時能盡現覺知衆魔事而示隨其行以善方便智隨意皆能現或示老病死

什曰如佛欲化弗迦沙王故現作老比丘亦如四城門所化比也

成就諸群生了知如幻化通達無有闕或現劫  
盡燒天地皆洞然衆生有常想照令知無常

什曰或實燒或不實燒不實燒者二日乃至  
三日四日出時衆生見燒相即悟無常還攝  
不燒也

無數億衆生俱來請菩薩一時到其舍化令向  
佛道經書禁呪術工巧諸伎藝盡現行此事饒  
益諸群生世間衆道法悉於中出家

什曰以同習相感先同而後乖也出家人有

德爲物所宗故現入出家脩德引物也

因以解人惑而不墮邪見

肇曰九十六種皆出家求道隨其出家欲解  
其惑不同其見也

或作日月天

什曰劫初時未有日月亦未有衆生幽冥處  
初不見日月故爲作日月今得照明也

梵王世界主或時作地水或復作風火

什曰劫初地未成以神力令六方風來吹水

結而成地或見人入海船欲沒時爲化作地  
令得安隱至須水火風處皆應其所求也或  
化作或以身作也食及藥中亦如是也

劫中有疾疫現作諸藥草

什曰或令除病或得昇仙因而化之使入正  
道外國有竒妙藥草或似人形或似象馬形  
似象馬者有人乘之徑凌虛而去或但見聞  
此藥衆病即消也

若有服之者除病消衆毒劫中有饑饉現身作  
飲食先救彼饑渴却以法語人劫中有刀兵爲  
之起慈悲

什曰將來世劫盡時刀兵起人壽十歲婆湏  
密從忉利天下生王家作天子化衆人言我  
等祖父壽命極長以今瞋恚無慈故致此短  
壽是故汝等當行慈心衆人從命惡心漸薄  
此後生子壽二十歲如是轉續至彌勒時八  
萬四千歲也

化彼諸衆生令住無諍地若有大戰陣立之以

等力菩薩現威勢降伏使和安

什曰兩陣相對助其弱者二衆旣均無相勝負因是彼此和安矣

一切國土中諸有地獄處輒往到于彼勉濟其苦惱一切國土中畜生相食噉皆現生於彼爲之作利益

什曰如過去世時人無禮義欲殘害長老猴象及鳥推敬長老令人獸脩善咸相和順如大智度論中說

示受於五欲亦復現行禪令魔心憤亂不能得其便

肇曰欲言行禪復受五欲欲言受欲復現行禪莫測其變所以憤亂也

火中生蓮華是可謂希有在欲而行禪希有亦如是

肇曰自非靜亂齊旨者孰能兩之者也

或現作媼女引諸好色者先以欲鈎牽後令入佛智或爲邑中王或作商人導國師及大臣以

維摩詰經 卷五 十三  
祐利衆生諸有貧窮者現作無盡藏因以勸導  
之令發菩提心我心喬慢者爲現大力士消伏  
諸貢高令住無上道

肇曰慢心自高如山峯不停水菩薩現爲力  
士伏其高心然後潤以法水

其有恐懼者居前而慰汝先施以無畏後令發  
道心或現離婬欲爲五通仙人開導諸群生令  
住戒忍慈

什曰世無賢聖衆生下劣不入深法故化以

戒忍也

見須供事者現爲作僮僕旣悅可其意乃發以  
道心隨彼之所須得入於佛道以善方便力皆  
能給足之如是道無量所行無有涯智慧無邊  
際度脫無數衆假令一切佛於無數億劫讚歎  
其功德猶尚不能盡誰聞如是法不發菩提心  
除彼不肖人癡冥無智者

入不二法門品第九

爾時維摩詰謂衆菩薩言諸仁者云何菩薩入

不二法門

什曰有無迭用佛法之常前品說有故次說空門復次從始會以來唯二人相對餘皆默然今欲各顯其德故門令盡說亦云情或不  
同發悟有因令各說悟廣釋衆迷夫勝會明宗必以令終爲美今法坐將散欲究其深致廣說不二乃盡其妙也問曰亦有三四乃至無量法門云何獨說不二耶答曰二事少而惑淺餘門事廣而累深二尚應破則餘可知

也復次寓法之生必從緣起緣起生法多少不同極其少者要從二緣若有一緣生未之聞也然則有之緣起極於二法二法旣廢則入於玄境亦云二法門攝一切法門云何不  
破一耶答曰若名數之則非一也若以一爲一亦未離於二遣二則一斯盡矣復次無相之一名假而實亡實亡則體與相絕故直置而自無也

各隨所樂說之

肇曰自經始以來所明雖殊然皆大乘無相之道無相之道即不可思議解脫法門不可思議解脫法門即第一義無二法門此淨名現疾之所建文殊問疾之所立也凡聖道成莫不由之故事爲篇端談爲言首究其所歸一而已矣然學者開心有地受習不同或觀生滅以反本或推有無以體真或尋罪福以得一或察身口以真寂其塗雖殊其會不異不異故取衆人之所同以證此經之大旨也

會中有菩薩名法自在說言諸仁者生滅爲二法本不生今則無滅得此無生法忍是爲入不二法門

肇曰滅者滅生耳若悟爲生滅何所滅此即無生法忍也此菩薩因觀生滅以悟道故說已所解爲不二法門也下皆類耳萬法云云離真皆名二故以不二爲言

德守菩薩曰我我所爲二因有我故便有所若無有我則無我所是爲入不二法門

肇曰妙主常存我也身及萬物我所也我所  
我之有也法既無我誰有所也

不眴菩薩曰

什曰不眴有三義一如天二愛敬佛身諦觀  
不眴三心無塵翳慧眼常開

受不受爲二

什曰受不受取相不取相也亦有漏五陰名  
爲受無漏名不受也亦云受心不受心如阿  
毘曇心說

若法不受則不可得以不可得故無取無捨

什曰遣不受也

無作

什曰言不復作受生業也

無行

什曰心行滅也

是爲入不二法門

肇曰有心必有所受有所受必有所不受此  
爲二也若悟法本空二俱不受則無得無行

爲不二也

德頂菩薩曰垢淨爲二見垢實性

什曰如洗穢物至盡乃淨淨則盡盡則無淨也

則無淨相順於滅相是爲入不二法門

肇曰淨生於垢實性無垢淨何所淨

善宿菩薩曰是動是念爲二

什曰惑心微起名爲動取相深著名爲念始終爲異耳無取遣受也

不動則無念無念即無分別通達此者是爲入不二法門

善眼菩薩曰一相無相爲二若知一相即是無相亦不取無相入於平等是爲入不二法門

肇曰言一欲以去二不言一也言無欲以去有不言無也而或者聞一則取一相聞無則取無相故有二焉

妙臂菩薩曰

什曰以施報故手能出無盡寶物如五何流

故名妙臂也

菩薩心聲聞心爲二觀心相空如幻化者無菩薩心無聲聞心是爲入不二法門

弗沙菩薩曰

什曰二十八宿中鬼星名也生時所值宿因以爲名也

善不善爲二

什曰一切有漏善心及善身口業無漏乃至涅槃名爲善一切煩惱所作身口業名不善

也

若不起善不善入無相際而通達者是爲入不二法門

師子菩薩曰罪福爲二

什曰三界煩惱煩惱相應及煩惱所作身口業盡名罪一切有漏善盡名爲福

若達罪性則與福無異以金剛慧決了此相

什曰金剛置地至地際然後乃止實相慧要盡法性然後乃止也

無縛無解者是爲入不二法門

師子意菩薩曰

什曰師子度水要截流直渡曲則不度此大士以實智慧深入諸法直過彼岸故借以爲名也

有漏無漏爲二若得諸法等則不起漏不漏想不著於相亦不住無相是爲入不二法門

淨解菩薩曰有爲無爲爲二若離一切數則心如虛空以清淨慧無所闕者是爲入不二法門

那羅延菩薩曰世間出世間爲二

什曰世間三界也出世間一切無漏有爲道品法也

世間性空即是出世間於其中不入不出

什曰出義生於入也無入生死故無出世間也

不溢

什曰梵本云流也

不散

肇曰夫有入則有出有出必有溢有溢必有散此俗中之常數

是爲入不二法門

善意菩薩曰生死涅槃爲二

什曰上言無爲三無爲也今明究竟涅槃也若見生死性則無生死無縛無解不然不滅如是解者是爲入不二法門

肇曰縛然生死之別名解滅涅槃之異稱現見菩薩曰盡不盡爲二法若究竟盡

什曰無常是空之初門破法不盡名爲不盡若乃至一念無有生無有生則生盡生盡則畢竟空是名爲盡也

若不盡皆是無盡相無盡相即是空空則無有盡不盡相如是入者是爲入不二法門

肇曰有爲虛僞法無常故名盡實相無爲法常住故不盡若以盡爲盡以不盡爲不盡者皆二法也若能悟盡不盡俱無盡相者則入一空不二法門也

普守菩薩曰我無我爲二我尚不可得非我何  
可得見我實性者不復起二是爲入不二法門  
肇曰非我出於我耳見我實性者我本自無  
而况非我也

電天菩薩曰明無明爲二無明實性即是明明  
亦不可取離一切數於其中平等無二者是爲  
入不二法門

肇曰明慧明也無明癡冥也見無明性即爲  
是明若見明爲明即是無明故不可取也

喜見菩薩曰色色空爲二色即是空非色滅空  
色性自空如是受想行識識空爲二識即是空  
非識滅空識性自空於其中而通達者是爲入  
不二法門

肇曰色即是空不待色滅然後爲空是以見  
色異於空者則二於法相也

明相菩薩曰四種異空種異爲二

什曰外道法中有五大佛法中有四大此四  
種於作法中最大故稱爲大

四種性即是空種性如前際後際空故中際亦  
空若能如是知諸種性者是爲入不二法門

肇曰四種四大也空種空大也此五衆生之  
所由生故名種然四大之性無前後中無異  
空大也

妙意菩薩曰眼色爲二若知眼性於色不貪不  
恚不癡是名寂滅如是耳聲鼻香舌味身觸意  
法爲二若知意性於法不貪不恚不癡是名寂  
滅安住其中是爲入不二法門

肇曰存於情塵故三毒以生若悟六情性則  
於六塵不起三毒此寂滅之道矣

無盡意菩薩曰布施廻向一切智爲二布施性  
即是廻向一切智性如是持戒忍辱精進禪定  
智慧廻向一切智爲二智慧性即是廻向一切  
智性於其中入一相者是爲不二法門

肇曰以六度爲妙因廻向一切智者二也若  
悟因果同性入于一相乃應不二

深慧菩薩曰是空是無相是無作爲二空即無

相無相即無作若空無相無作即無心意識於  
一解脫門即是三解脫門者是爲入不二法門  
肇曰三行雖異然俱是無緣解脫故無心意  
識也無緣既同即與三解脫無異

寂根菩薩曰佛法衆爲二

生曰有相則有對有對則爲二不繫一與二  
也

佛即是法

生曰以體法爲佛不可離法有佛也若不離

法有佛佛是法也然則佛亦法矣

法即是衆

生曰亦以體法爲衆

是三寶皆無爲相

肇曰無相真智佛寶也實相無爲法寶也脩  
無爲道僧寶也三寶雖異皆無爲相也

與虛空等一切法亦爾能隨此行者是爲入不

二法門

心無閔菩薩曰身身滅爲二

什曰身五受陰也身滅涅槃也

身即是身滅所以者何見身實相者則不起見身及見滅身身與滅身無二無分別於其中不驚不懼者是爲入不二法門

肇曰諸法生時空生滅時空滅身存身亡亦何以異而懷驚懼於其中乎

上善菩薩曰身口意業爲二是三業皆無作相身無作相即口無作相口無作相即意無作相是三業無作相即一切法無作相能如是隨無

作慧者是爲入不二法門

肇曰三業雖殊無作一也諸法之生本于三業三業旣無誰作諸法也

福田菩薩曰福行罪行不動行爲二

什曰福行欲界善行能得樂報也罪行十不善道能得苦報也無動行色無色界行不動義如通達佛道中說也

三行實性即是空空即無福行無罪行無不動行於此三行而不起者是爲入不二法門

肇曰福欲界善行罪十惡之流不動色無色界行也

華嚴菩薩曰從我起二爲二見我實相者不起二法若不住二法則無有識無所識者是爲入不二法門

肇曰因我故有彼二名所以生若見我實相則彼我之識無由而起

德藏菩薩曰有所得相爲二若無所得即無取捨無取捨者是爲入不二法門

肇曰得在於我相在於彼我不得相誰取誰捨

月上菩薩曰闇與明爲二無闇無明即無有二所以者何如入滅受想定

什曰旨明此中知照滅無有明闇也

無闇無明一切法相亦復如是於其中平等入者是爲入不二法門

肇曰二乘入滅盡定六根盡廢心想都滅雖經晝夜不覺晦明之異喻菩薩無心於明闇

耳

寶印手菩薩曰樂涅槃不樂世間爲二若不樂  
涅槃不厭世間則無有二所以者何若有縛則  
有解若本無縛其誰求解無縛無解則無樂厭  
是爲入不二法門

肇曰世間無縛曷爲而厭涅槃無解曷爲而  
樂

珠頂王菩薩曰正道邪道爲二住正道者則不  
分別是邪是正離此二者是爲入不二法門

樂實菩薩曰實不實爲二實見者尚不見實何  
况非實所以者何非肉眼所見慧眼乃能見而  
此慧眼無見無不見是爲入不二法門

肇曰實相慧眼之境非肉眼所見慧眼尚不  
見實而况非實雖曰無見而無所不見此真  
慧眼之體

如是諸菩薩各各說已

問文殊師利何等是菩薩入不二法門文殊師  
利曰如我意者於一切法無言無說無示無識

離諸問答是爲入不二法門

生曰前諸菩薩各說不二之義似有不二可說也若有不二可說者即復是對一爲不二也是以文殊明無可說乃爲不二矣

於是文殊師利問維摩詰我等各自說已仁者當說何等是菩薩入不二法門時維摩詰默然無言

什曰自佛涅槃後六百年有一人年六十出家未幾時頌三藏都盡次作三藏論議作論

已思唯言佛法中復有何事唯有禪法我當行之於是受禪法自作要誓若不得道不具一切禪定功德終不寢息脇不著地因名脇比丘少時得成阿羅漢具三明六通有大辯才善能論議有外道師名曰馬鳴利根智慧一切經書皆悉明練亦有大辯才能破一切論議聞脇比丘名將諸弟子往到其所唱言一切論議悉皆可破若我不能破汝言論當斬首謝屈脇比丘聞是論默然不言馬鳴即

生憍慢此人徒有空名實無所知與其弟子  
捨之而去中路思惟已語弟子言此人有甚  
深智慧我墮負處弟子怪而問曰云何爾答  
曰我言一切語言可破即是自破彼不言則  
無所破即還到其所語脇比丘言我墮負處  
則是愚癡愚癡之頭非我所須汝便斬之若  
不斬我我當自斬脇比丘言不斬汝頭當斬  
汝結髮比 於世間與死無異即下髮爲脇  
比丘作弟子智慧辯才世無及者廣造經論

大弘佛法時人謂之爲第二佛夫默語雖殊  
明宗一也所會雖一而迹有精麤有言於無  
言未若無言於無言故默然之論論之妙也  
肇曰有言於無言未若無言於無言所以默  
然也上諸菩薩措言於法相文殊有言於無  
言淨名無言於無言此三明宗雖同而迹有  
淺深所以言後於無言知後於無知信矣哉  
生曰文殊雖明無可說而未明說爲無說也  
是以維摩默然無言以表言之不實言若果

實豈可默哉

文殊師利歎曰善哉善哉乃至無有文字語言  
是真入不二法門

肇曰默領者文殊其人也爲彼持言所以稱  
善也

說是入不二法門品時於此衆中五千菩薩皆  
入不二法門得無生法忍

香積佛品第十

於是舍利弗心念日時欲至此諸菩薩當於何

食

什曰舍利弗獨發念者其旨有三一者結業  
之體未能無資二絕意大方樂法不深三推  
已有待謂衆亦然處弟子之上宜爲衆致供  
也生曰不念弟子者以其自有乞食法

時維摩詰知其意而語言佛說入解脫仁者受  
行豈雜欲食而聞法乎

肇曰佛說入解脫乃是無欲之嘉肴養法身  
之上饍仁者親受謂無多求然方雜食想而

欲聽法豈是無舉來求之情乎

若欲食者且待須臾當令汝得未曾有食時維摩詰即入三昧以神通力示諸入衆上方界分過四十二恒河沙佛土有國名衆香佛號香積今現在其國香氣比於十方諸佛世界人天之香最爲第一彼土無有聲聞辟支佛名惟有清淨大菩薩衆佛爲說法其界一切皆以香作樓閣經行香地苑園皆香其食香氣周流十方無量世界時彼佛與諸菩薩方共坐食有諸天子皆鬪香嚴悉發阿耨多羅三藐三菩提心供養彼佛及諸菩薩此諸大衆莫不目見時維摩詰問衆菩薩言諸仁者誰能致彼佛飯以文殊師利威神力故咸皆默然

肇曰文殊將顯淨名之德故以神力令衆會默然矣

維摩詰言仁此大衆無乃可耻文殊師利曰如佛所言勿輕未學於是維摩詰不起于座居衆會前化作菩薩相好光明滅德殊勝蔽於衆會

而告之曰汝往上方界分度四十二恒河沙佛  
土有國名衆香佛號香積與諸菩薩方共坐食  
汝往到彼如我辭曰維摩詰稽首世尊足下致  
敬無量問訊起居少病少惱氣力安不願得世  
尊所食之餘當於娑婆世界施作佛事令此樂  
小法者得弘大道亦使如來名聲普聞時化菩  
薩即於會前昇於上方舉衆皆見其去到衆香  
界禮彼佛足又聞其言維摩詰稽首世尊足下  
致敬無量問訊起居少病少惱氣力安不願得

世尊所食之餘欲於娑婆世界施作佛事使此  
樂小法者得弘大道亦使如來名聲普聞彼諸  
大士見化菩薩歎未曾有今此人從何所來  
娑婆世界爲在何許云何名爲樂小法者即以  
問佛

肇曰彼諸大士皆得神遠然不能常現在前  
又其士純一大乘不聞樂小之名故生斯問  
也

佛告之曰下方度如四十二恒河沙佛土有世

界名娑婆佛號釋迦牟尼今現在於五濁惡世  
爲樂小法衆生敷演道教彼有菩薩名維摩詰  
住不可思議解脫爲諸菩薩說法故遣化來稱  
揚我名并讚此士令彼菩薩增益功德彼菩薩  
言其人何如乃作是化德力無畏神足若斯佛  
言甚大一切十方皆遣化往施作佛事饒益衆  
生

於是香積如來以衆香鉢盛滿香飯與化菩薩  
時彼九百萬菩薩俱發聲言我欲詣娑婆世界  
供養釋迦牟尼佛并欲見維摩詰等諸菩薩衆  
佛言可往攝汝身香無令彼諸衆生起惑著心  
又當捨汝本形勿使彼國求菩薩者而自鄙耻  
又汝於彼莫懷輕賤而作閎想所以者何十方  
國土皆如虛空又諸佛爲欲化諸樂小法者不  
盡見其清淨土耳時化菩薩旣受鉢飯與彼九  
百萬菩薩俱承佛威神及維摩詰力於彼世界  
忽然不現須臾之間至維摩詰舍時維摩詰即  
化作九百萬師子之座嚴好如前諸菩薩皆坐

其上化菩薩以蒲鉢香飯與維摩詰飯香普薰毗耶離城及三千大千世界時毗耶離婆羅門居士等聞是香氣身意快然歎未曾有

於是長者主月蓋從八萬四千人來入維摩詰舍

什曰彼國無王唯五百居士共治國政今言主衆所推也肇曰毘耶離國無有君王唯有五百長者共理國事月蓋衆所推重故名主自此下皆聞香而後集矣

見其室中菩薩甚多諸師子座高廣嚴好皆大歡喜禮衆菩薩及大弟子却住一面諸地神虛空神及欲色界諸天聞此香氣亦皆來入維摩詰舍時維摩詰語舍利弗等諸大聲聞仁者可食如來甘露味飯

生曰以其向念故教食之也亦欲因以明食之爲理泥洹是甘露之一法而食此食者必以得之故飯中有甘露味焉

大悲所薰

什曰薰義有二一大悲果報二悲心所念三  
以慈眼視之

無以限量食之使不消也

什曰食此飯應發大心建大業是名報恩報  
恩名爲消也

有異聲聞念是飯少而此大衆人人當食化菩  
薩曰勿以聲聞小德小智稱量如來無量福慧  
四海有竭此飯無盡使一切人食揣若須彌乃  
至一劫猶不能盡所以者何無盡戒定智慧解

脫解脫知見功德具足者所食之餘終不可盡  
於是鉢飯悉飽衆會猶故不賜其諸菩薩聲聞  
天人食此飯者身安快樂譬如一切樂莊嚴國  
諸菩薩也又諸毛孔皆出妙香亦如衆香國土  
諸樹之香

爾時維摩詰問衆香菩薩香積如來以何說法  
彼菩薩曰我土如來無文字說但以衆香令諸  
天人得入律行

肇曰其土非都無言但以香爲通道之本如

此國因言通道亦有因神變而得悟者

菩薩各各坐香樹下聞斯妙香即獲一切德藏  
三昧得是三昧者菩薩所有功德皆悉具足彼  
諸菩薩問維摩詰今世尊釋迦牟尼佛以何說  
法維摩詰言此土衆生剛強難化故佛爲說剛  
強之語以調伏之

什曰如來說法其要有一軟善語二剛強  
語三雜說善行樂果軟善語也惡行苦果剛  
強語也讚善毀惡雜說也

言是地獄是畜生是餓鬼是諸難處

肇曰徧示八難處也

是愚人生處是身邪行是身邪行報是口邪行  
是口邪行報是意邪行是意邪行報是殺生是  
殺生報是不與取是不與取報是邪婬是邪婬  
報是妄語是妄語報是兩舌是兩舌報是惡口  
是惡口報是無義語是無義語報是貪嫉是貪  
嫉報是瞋惱是瞋惱報是邪見是邪見報是慳  
吝是慳吝報是毀戒是毀戒報是瞋恚是瞋恚

報是懈怠是懈怠報是亂意是亂意報是愚癡  
是愚癡報是結戒是持戒是犯戒是應作是不  
應作是障闕是不障闕是得罪是離罪是淨是  
垢是有漏是無漏是邪道是正道是有爲是無  
爲是世間是涅槃以難化之人心如猿猴故以  
若干種法制御其心乃可調伏

肇曰以其難化故示罪福之若是也

譬如象馬瀧戾不調加諸楚毒乃至徹骨然後  
調伏

什曰馬有五種第一見鞭影即時調伏第二  
得鞭乃伏第三以利錐刺皮乃伏第四穿肌  
乃伏第五徹骨乃伏衆生利鈍亦有五品第  
一但見他無常其心便悟第二見知識無常  
其心乃悟第三見兄弟親戚無常其心乃悟  
第四見父母無常其心乃悟第五自身無常  
極受苦惱復加以苦言然後乃悟也

如是剛強難化衆生故以一切之言乃可入律  
彼諸菩薩聞說是已皆曰未曾有也如世尊釋

迦牟尼佛隱其無量自在之力乃以貧所樂法  
度脫衆生

什曰晦跡潛明自同貧乞自同貧乞則與相  
接接則易鄰故爲貧所信樂也

斯諸菩薩亦能勞謙以無量大悲生是佛土維  
摩詰言此土菩薩於諸衆生大悲堅固誠如所  
言然其一世饒益衆生多於彼國百千劫行

什曰譬如良醫遇疫劫中醫術大行廣施衆  
藥所療者衆致供無量菩薩大士處不淨國

亦復如是衆惡彌滋兼濟乃弘十事法藥廣  
濟衆病化廣利深一世超於萬劫

所以者何此娑婆世界有十事善法諸餘淨土  
之所無有何等爲十以布施攝貧窮以淨戒攝  
毀禁以忍辱攝瞋恚以精進攝懈怠以禪定攝  
亂意以智慧攝愚癡

什曰癡有二種一者一切法中癡二者於諸  
佛深法中不能明了不淨國中有二種癡淨  
國中乃說唯有佛法中不了癡

說除難法度八難者以大乘法度樂小乘者以諸善根濟無德者常以四攝成就衆生是爲十肇曰夫善因惡起淨由穢增此土十惡法具故十德增長彼土純善故施德無地所以百千劫行不如一世也

彼菩薩曰菩薩成就幾法於此世界行無瘡疣生于淨土

什曰深行菩薩非所疑也今淺行者處不淨國恐其行淺功微未能自拔譬如少湯投之


大木亦如少力之人入水救溺未能兼濟則與彼俱淪故問以何爲法得生淨國也

維摩詰言菩薩成就八法於此世界行無瘡疣生于淨土何等爲八饒益衆生而不望報代一切衆生受諸苦惱所作功德盡以施之等心衆生謙下無闕於諸菩薩視之如佛所未聞經聞之不疑不與聲聞而相違背不嫉彼供不高已利而於其中調伏其心常省已過不訟彼短什曰如一比丘林中坐禪時至須食持鉢出

維摩詰經 卷五  
林路逢惡賊惡賊引弓射之比丘恕已自責  
不生惡心又指腹語賊汝應射此我爲彼出  
林故致斯惱此腹之罪耳省已恕物類如此  
也不訟彼短不如彼鈍根維那就地舐穢求  
人短也省已過乃至求諸功德通爲一事  
恒以一心求諸功德是爲八

肇曰塵垢易增功德難具自非一心專求無  
以尅成具此八法則行無瘡疣終生淨土矣  
維摩詰文殊師利於大衆中說是法時百千天  
人皆發阿耨多羅三藐三菩提心十千菩薩得  
無生法忍

維摩詰所說經卷第五



糸屋言糸

三

三

